

Pon 29
694 2R

1. von Andorff / Nic. / Vermahnung
an die von Magdeburg
D. Ciclop. Wittenberg, 1528
2. daß die proposition,
gütliche u. wohl seyn zu seyn
lichter schändlich; eine ansehn
hauptliche propositio seye.
1559.
3. unterweist auß
neue jasn Regensburg 1561.
4. daß Johann Wigand
unbillig seine Vermahnung
an die von Magdeburg
Magdeburg, 1564.

5. ———— apia christlich Heshu.
suis mit mir fandolt,
Magdeburg, 1569.
6. Wigand Joh. vom Amt der
Gosfeld wider Nic. Amsdorff
1569
7. Passavant s. Ludewij / wider
Ezang Joh. Agricola tont / fr
Sprünfer
Scholasticorum Academie
8. Wittenbergensis Brieft, vom
anfang der Zerrüttung Matth.
flaccii, 1558.
9. Schriften und Acten aus
vict: Strigelius wider in
sein Amt in jena gosfeld
wider. 1562.
10. Epplini s. Attomari / Wofar
mannum Josub Christus zwee
wurde naturam labor misse, Königs;
entfernt, berg 1557.
11. Pfeffinger s. Joh. vorantiner,
Matth. flaccium,
Ezang 1557

12. Coelestini s. Joh. Friede /
Bändel mit von der Gotteskinder
13. Martini s. Nic. / Gotteskinder
Eulenburg, 1539.

Das Johannes Wi-
gandus vnbillich meine verma-
nung an die von Magdenburgk straffet/
vnd mich schilde/ lestert vnd
Liegen heiff.

Niclas von Amisdorff.

Gedruckt zu Magdeburgk/durch
Joachim Walden.

M. D. LVIII.

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.


Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.



Das Johannes Wigandus vnbillich

meine vermanung an die von Magdens
burgk straffet / vnd mich schilt / lestert
vnd Liegen heist.



Wigandus vnd
Mattheus Judex seind
sehr zornig / schenden
vnd lestern mich / als
wer ich ein feind des E-
uangelij / heissen mich
liegen / straffen vñ schel-
ten mich / das ich die
ausgefurten pRediger
aus falschem grund vñ
vnuerhört verdammet

hab / vnd solch mein vrtheil sey erpracticirt vnd mit
Talern erlangt / etc.

Solche grobe greiffliche Lügen mus ich von
meinem Schulmeister leiden / das Er mich mit rus-
then streiche vnd wol ausfiltze / wie er in der Kin-
derschulen gethan hat. Darumb mus ich im sei-
ne Lügen fur die Nase halten / vnd aller Welt an-
zeigen das Er Mir gewalt vnd vnrecht thut / vnd
Mich vnbillich ohn vrsach Liegen heist.

Denn ich bin allein aus dem Druck so von
beiden theilen offentlich ausgegangen ist / meine
vermanung zu Schreiben bewogen worden / ehe

2 ij

mich

mich ein Mensch angesprochen oder angeredt hat/
das sich die Bürger zu Magdenburg nicht zu vnge-
horsam bewegen liessen / vmb der Ausgefurten
Prediger willen.

Wie das meine Schrift an den würdigen
Herrn Sebastian Werner Pastor zu S. Ulrich
meinen geliebten Bruder in Christo zeugt vnd bes-
weist / das Ich von mir selbst ohn alles anregen
eines Menschen dieselbige meine vermanung an
die zu Magdenburg gethan habe / Solchs wirdt
das Datum meiner Schrift an gedachten Er-
Bastian klerlich zeugen vnd ausweisen.

Darumb Liegen sie alle / als des Teufels
schupen vnd glieder / das meine vermanung an die
zu Magdenburg solt vmb Thaler willen exprac-
ticirt sein / Ich habe nicht ein pfenning noch heller
gesehen / der mir wer angebotē worden / ich schwei-
ge / das ich etwas solt empfangen oder angenomē
haben / Darumb ist jr schreiben nichts denn lau-
ter argwenische gedanken / so aus jrem falschen
hertzen vñ bösen gewissen fließen vnd erdicht seint.

Vnd wenns rühmens gulte / so wolt ich wol
weiter sagen / aber ich wils dabey bleibē lassen / vnd
Gott beuehlen / das sie mich aus jrem argwenigen
hertzen so felschlich anliegen / schenden vñ lestern /
das ich vmb gelts vnd guts willen / wider Gott vnd
sein Wort etwas thuen oder fürnemen solte / Gott
hat mich dafür behüt / er wird mich auch fürder
dafür gnediglich behüten / welchs ich alle meine
freunde vnd feinde / so von anfang vmb mich /
vnd

vnd bey mir gewesen sint / wil zeugen vnd sagen
lassen.

Nu wolan ich mus leiden / das mich mein
Schulmeister meistert vnd streichet / Aber es ist
nicht wunder / weil er die gantze Christenheit mit
seinem schreiben zu meistern vnd regieren sich vnter
stehet / wiewol er vorhin billich zur Schule gangen
were / vnd gelernet hette / ehe er das Doctor mütz
lein auffgesetzt het / worumb oder wozu das Ges
setz gegeben were / denn er schreibt / das Gesetz sey
ein weg zur seligkeit / welchs wider Paulum vnd die
gantze Schrifft ist / die zeuget vnd sagt / das nicht
mehr denn ein einiger weg zur seligkeit ist / wie auch
Christus vnser lieber Herr selbst sagt / Ego sum
via / veritas et vita. Ergo lex non est via / veritas / et
vita.

Darauff folget der irthumb / das etliche schreibe
bē / die wercke sein im Gesetz zur seligkeit von nöten /
vnd das das Gesetz die Werck fordere / darumb
das sie zur seligkeit vonnöten sint / so doch das Ges
setz die Werck allein darumb von vns fordert / das
wir vnser schwachheit erkennen sollen / das wir sie
nicht thun können / darumb ist das Gesetz ein Ges
setz des zorns vñ des todes / Darumb weis Wigand
us nicht / warumb das Gesetz gute werck fordert /
dieweil er in seiner Historia Ecclesiastica schreibt /
Es sint zwene wege zur seligkeit / denn das ist der
Maioristen einige grund / darauff sie iren irthumb
bawen / Vnd ob Wigandus vñ sein anhang wider
Maiores fechten / so sind sie doch im grunde rech

te Maioristen / Darumb solt er mich vngemeistert
lassen/ biß in die Feddern besser wüchsen.

Aber die stoltzen hoffertigen Geister vmb irer
Kunst willen/ das sie in sprachen gelert sein oder sein
wollen/ dringen sich ein/ vnd wollen nicht allein
den Man Gottes/ Lutherum vnd die gantze Chris-
tenheit meistern vnd regieren / gleich ob sie vber vñ
wider Lutherum / der Christenheit zu helfen von
Gott beruffen weren/ vnd wissen nicht worzu oder
worumb das Gesetz gegeben ist/ vnd gute Werck
von vns fordert.

Wenn sie Lutheri Schüler blieben / vnd ein-
trechtig mit im lereten / das nur ein weg zur selig-
keit/ nemlich/ das Euangelium / vnd das das Ge-
setz nicht gegeben sey zur seligkeit/ welch allein vers-
heissen ist / Sondern darzu / das wir erkennen sol-
len/ das es vns vnmöglich ist/ das wir seine Werck
thun / so hetten sie solchen lerman vnd tumult zu
Magdenburgk nicht angericht.

Aber der Bauch war in auffgeblasen / vnd
wolt für grosser Kunst bersten / giengen mit vnglück
schwanger / aber sie haben geboren einen greulich-
en fehl / das sie den Rath in Basl gethan / sine con-
sensu Ecclesie / vnd solchen falschen / nichtigen vnd
vnchristlichen Bann lobet vnd vertediget Wigans-
dus mit seiner Kotten / vnd verdampt die Kirche zu
Magdenburgk / vnd derselbigen Diener / so die reiz-
ne Lehr

ne Lehre des Euangelij noch heutiges tages leren
vnd predigen.

Nu haben sie den Rath in Bann gethan / nicht
falscher Lehre halben / sondern der Wahl hal-
ben eines Pfarrhers / Das der Rath Wigandum
(welchen die ausgefurten Prediger / für einen pfar-
rer haben wolten) hinter seinem rücken / so nicht
wolt eindringen lassen / Derhalben der Rath den
Pfarrleuten zu S. Ulrich geboth / das sie mit der
Wahl / biss auff weitem bescheidt / solten inne hal-
ten .

Darauff schreib der vnflätige stoltze hofferri-
ge Geist / Wilhelmus Eccius an die Kirchner zu
S. Ulrich ein Brieff / das sie wider des Raths ges-
both vnd befehl / Wigandum wehlen solten / Ist
das zu fried vnd einigkeit gerathen ? oder die Bür-
ger zu vngheorsam vnd auffrur wider den Rath
gehetzt vnd bewegt / das lass ich einen jedern rich-
ten vnd vrteilen / vnd sonderlich dieweil sie es wider
den Rath / so das Euangelium gehen vnd predi-
gen lesset / gethan haben / Ist das erlogen Wigand-
de ? ist das ein falscher grundt meiner vermanung /
wie du mich so schendtlich anleugst ?

Zum andern / machen sie solchen Politicum /
vnd Christliche Mandat des Raths / zu einer solch-
en grossen schweren Sünde / das sie den Rath dar-
umb in Bann / sine consensu Ecclesie gethan ha-
ben / Ist das erlogen Wigande ? ist das ein falscher
grundt ? wie du mit deiner Kotten leugest / trottest
vnd puchest.

Zum

Zum dritten so leuget Wilhelmus Eccius so
schendlich vnd offentlich/das er sagt der Rath has
be den Bürgern ire freie Wahl genommen / So
doch der Rath die Wahl allein auffgezogen vnd
auffgeschoben hatte/ Ist das erlogen Wigande?
Ist das ein falscher grundt? Solt ich solche lügen
billichen vnd loben? vnd die Kirche Christi mit
ihren trewen frommen Predicanten verdammen /
wie du mit deiner Kotten thust?

Solt ich das preisen vnd loben / das Wilhel-
mus Eccius durch solche lügen die Bürger wider
den Rath zu vngheorsam reitzt vnd hetzt? Wie du
thust mit deiner Kotten. Ist nicht sünde vnd
schande / das jr mit ewer Kotte solche that loben
vnd vertedigen/vnd ein gantze Kirche mit iren Pre-
digern (so die Lehre des Euangelij lauter vnd rein/
ohn alle Corruptelē leren vnd predigen) allein vmb
eusserlichs dings willen/ als vmb der Wahl willen
eins Pfarres/verdammen solt.

Und wer weis was der Rath für feel an Wis-
gando gehabt hat/Denn die Euangelische Predi-
ger eins theils / haben itzund so seltsam eigensin-
nige vnd störrige Köpffe / das sie mit niemandt
sich vertragen können / vnd den leuten vnleidlich
sint.

Zum vierden/haben die ausgefürten Prediger
mit irem brieff vnd solcher lügen / dem Rath / als
der von Gott geordneten Oberigkeit/ seine gerech-
tigkeit verbieten vnd nemen wollen / das er nicht
darauff sehen vnd achtunge haben solt / was für
Pfarrer

Pfarrer vnd Prediger die Bürger wehleten / vnd
den Bürgern die macht vnd gewalt geben / das sie
ohn wissen vnd willen / ja wieder des Raths wil-
len / wehlen möchten wen sie wolten / Solt ich das
loben Wigande ? Solt ich das für recht sprechen ?
Sol ein Oberigkeit nicht darauß sehen / das rech-
te Pfarrer vnd Prediger erwelet werden ? Ist das
ein falscher grundt / darumb die außgeführten Pre-
diger verdampt sindt ? Meinstu ich solte solchen
auffrührischen Brieff vnd Lügen vertedigen ? wie
du thust mit deiner Kotten.

Zum sechsten so hat Bartolomeus / die zeit
Caplan zu S. Jacob / sine consensu Ecclesie / ja
ohn vnd wider seines Pfarrers wissen vnd willen /
den Rath in Bann gethan / Ist das erlogen Wi-
gande ? Ist das ein falscher grundt / darumb die
außgeführten Prediger verdampt sindt ? Solt ich
solchen falschen vnd nichtigen Bann (der da ge-
schicht sine consensu Pastoris et Ecclesie) loben /
preisen vnd vertedigen ? wie du thust mit deiner
Kotten / da sey Gott für / Denn ich hab von Lu-
thero aus S. Paulo viel anders gelernt / Darumb
habe ich die zu Magdenburgk billich vermant vnd
gewarnt / das sie sich am außführen solcher Gotts-
losen Predicanten (so die reinen Lehrer des Euang-
gelij schenden / lestern vnd lügen Prediger heißen)
nicht ergern solten / Dann es gebürt keinem Pastro-
ri / schweige denn einem Caplan / aus eigenem muts
willen vnd freuel / ohn der Kirchen verwilligung

zu Bannen/wie/wenn vnd wehn er wil/es gehört
mehr darzu / ordentlicher Proces vnd erkenntnis
der Kirchen/ Darumb hat er wider Gott vnd sein
Wordt / den Rath in Bann gethan / vnd sehr fre-
uel vnd muthwillig gehandelt / vnd die andern/
so solches verteidigen / loben vnd preisen / viel vbes-
ler vnd erger thun. Gott vergebte es inen.

Zum siebenden / Solches alles / des Wilhel-
mi Brieff / vnd des Bartolomei Bann / verteidig-
et / lobet vnd preiset Desshusius / als sey es recht
vnd wol gethan / Ist das erlogen Wigande? Ist
das ein falscher grundt / darauff ich meine verma-
nung / an die zu Magdenburgk gestalt habe?

Zum achten / So hat Desshusius selbst aus
eigenem freuel / ohn verwilligung der Kirchen / den
Rath in Bann gethan / allein darumb / das der
Rath etliche vngehorsame Bürger (die an Desshu-
sio hiengen / vnd Wigandum wider des Raths
willen / zum Pfarrher haben wolten) eingezogen
hatte. Ist das erlogen Wigande? Ist das ein
falscher grundt / darumb Desshusius verdampt
vnd außgefürt ist? Ist das ein falscher grundt/
darauff ich die zu Magdenburgk gewarnt vnd ver-
mant habe / das sie sich der außgefürten Prediger
nicht solten annemen? Worumb heistu mich
dann liegen? Aber es schadt nicht / Ich bin ein
Jung Geselle vnd dein Schüler / du magst mich
wol liegen heissen.

Zum

Zum neunnden / So haben die vier Schwere-
mer / da man sie geurlaubet hat / ihr keiner wollen
vrlaub haben / noch weichen wollen / sondern wol-
ten wider des Raths willen / Ja wider das geboth
vnd befehl Ihesu Christi vnser lieben DERN / in
ihrem ampt vnd dienst bleiben. Ist das erlogen
Wigande? Ist das ein falscher grundt? Wie du
mich so schendtlich vnd bösslich anleugst.

Zum zehenden / Dat Desshusius des Delli-
schen Mandats halben (so in nicht angieng / noch
der Kirchen zu Magdenburg auffgelegt war)
sich mit solchem stolz / zorn / trutz vnd puchen / wi-
der den Rath seine Obrigkeit auffgelehnet / Wie
das der Rath in seinem letzten druck anzeigt / das
erschrecklich von einem Christen / sonderlich von
einem Predicanten zu hören ist / so doch der Rath
weder ihm noch den andern / solches Mandat zu-
halten befohlen hat / Vnd nicht mehr von im bes-
gert hat / denn das Er mit seinem Donnern vnd
Blixen wieder solch Mandat vierzehnen tage solt
innehalten / welchs Er sich mit solchem Sturm
vnd Puchen geweigert hat / das es wunder ist / das
es ein Rath hat leiden können / vnd nicht mehr dars
zu gethan hat.

Er het billich die viertzehnen tage geschwie-
gen / vnd zugesehen / was weiter het volgen wol-
len / wo denn der Rath in vnd die Kirche hette bes-
schweren wollen / so hette Er denn fug vnd recht
gehabt / dawider zu predigen.

¶

Die

Dieweil er aber den Rath mit solchem greu-
lichen stürmen vnd puchen veracht / lestert vnd
schildt / als weren sie vom Euangelio abgefallen /
so habe ich die zu Magdenburgk / zu Friedt vnd ei-
nigkeit billich vermanet / Ist das erlogen Wigan-
de? ist das ein falscher grundt? wie du mir felsch-
lich schuldt gibst.

Darumb kan kein frommer Christ / solchen
greulichen vnd erschrecklichen vngheorsam ent-
schuldigen noch beschöner / Derhalben hat der
Rath solchen vngheorsam / freuel vnd pochen / ni-
cht leiden können noch sollen / So habe ichs auch
nicht loben noch preisen können / sondern aus Christ-
licher Liebe vnd pflicht verdammen müssen / auff
das die Bürger zu Magdenburgk den Brieff / vnd
den Bann der aussgefurten Prediger / sich nicht
irren noch anfechten liessen / vnd sich an dem auss-
füren der Prediger nicht ergerten.

Dann ob sie schon das Euangelium predi-
gen / so predigen sie es doch nicht mit bescheiden-
heit / wie Petrus lehret vnd gebeuth / Daben auch
der Liebe nicht / daran doch im Predigamt gar
viel gelegen / wie Paulus 1. Corinth. 8. vnd 13. be-
zeuget / Sie haben mit dem Brieff vnd Bann zu
viel gethan / das sie Sünde machen / da keine Sün-
de ist / sonderlich eine solche Sünde / darumb man
einen gantzen gemeinen Rath Bannen sol / Sie
haben sich den zorn vberreilen lassen / vnd zuweith
gegrif-

gegriffen / Solchs solten sie bekennen vnd erkennen / so könten sie der Kirche Christi noch wol nützlich sein.

Dieweil auch die außsgefurten Prediger / den Brieff vnd Bann öffentlich bekennen / so ist ohne noth gewest / das ich sie verhöret hette / Worumb vnd wor zu solt ich sie verhören / dieweil ich in nicht mehr schuldt gebe / denn das sie selbst bekennen vnd nicht leugnen können / Denn Wilhelms Brieff ist durch den druck außgegangen / So ist der Rath ohne verwilligung der Gemeine in den Bann gethan / wie kan ich doch solchs loben vnd preisen / vnd die reine Kirche zu Magdenburg mit ihren Predicanten vmb eusserlicher ding willen verdammen?

In summa / Wenn Wigandus vnd seine Note beweisen / das des Raths ciuile vnd politicum mandatum / ein crimen vnd laster ist / wie sie brüllen vnd schreien / darumb man einen Bannen kan vnd sol / so sollen sie gewonnen haben. Zum andern / Wenn sie beweisen / das ein Pfarrer macht vnd gewalt habe / ohn verwilligung der Gemeine in Bann zu thun / wie / wenn vnd wehner wil / so sollen sie recht haben. Zum dritten / Wenn sie beweisen / das ein Predicant / wenn man im vrlaub gibt / vnd nicht lenger haben wil / im ampt wider der Obrigkeit willen bleiben mögen / so sollen sie abermal gewonnen haben. Zum vierden / Wenn

B ij


sie bes

sie beweisen / das ein Pfarrer oder Predicant / vmb
eins frembden Mandats willen (damit Er noch
seine Kirche nicht beschwert wirdt) ein solchen tus
mult vnd vngheorsam in einer Stadt / wider einen
Rath möge anrichten / so wil ich inen gewonnen
geben. Item wenn sie beweisen / das ein Dbrig
keit nicht macht habe / darein zu sehen / was fur
Pfarrer vnd Prediger die Gemeine erwelet / so sol
len sie recht haben / vnd ich will widerruffen / vnd
die straffe willig leiden. Werden sie aber solches
alles aus der Schrifft / mit klaren hellen sprüchen
nicht beweisen / so sollen vnd müssen Wigandus
vnd seine Kotte / Schwermer vnd Auffrörer
bleiben / vnd von jederman dafür ges
acht vnd gehalten werden / so
lange sie ire Sünde vnd
Irthumb nicht er
kennen vnd
büßen.

*

Allein Gott die Ehr.





61



AB 154 075

ULB Halle 3
003 608 409




St. f


Hc 995

112
36

130







Das Johannes Wi-
gandus vnbillich meine verma-
nung an die von Magdenburgk straffet/
vnd mich schilde/ lestert vnd
Liegen heist.

Niclas von Amsdorff.

Gedruckt zu Magdeburgk/durch
Joachim Walden.

M. D. LVIII.